

Imigassat ilaannut Kalaallit Nunaanni sananeqarsimasunut akitsuutit pillugit Inatsisartut inatsisaat pillugu Namminersorlutik Oqartussat nalunaarutaat

Matumuuna Imigassat ethanolimik akullit Kalaallit Nunaanni sananeqarsimasut akitsuutaat pillugit inatsisartut inatsisaat nr. 20, 11. december 2003-meersooq, inatsisartut inatsisaat nr. 1, 26. april 2007-meersooq, inatsisartut inatsisaat nr. 9, 19. oktober 2007-meersooq, inatsisartut inatsisaat, nr. 2, 24. maj 2019-meersooq, aamma Inatsisartut inatsisaat nr. 69, 20. novembari 2023-meersooq kingunerisaanik allannguutit ilanngullugit nalunaarutigineqarput.

§ 1. Imigassanut ethanolimik akulinnut nunami maani sananeqarsimasunut akitsuummik akiliisoqartassaaq inatsimmi matumani malittarisassat malillugit annertussusiliinerillu uku malillugit:

- 1) 1,21-3,09 volumenprocent literimut: 3 kr. 50 øre
- 2) 3,10-4,09 volumenprocent literimut: 8 kr. 00 øre
- 3) 4,10-5,09 volumenprocent literimut: 21 kr. 00 øre
- 4) 5,10-7,09 volumenprocent literimut: 30 kr. 00 øre
- 5) 7,10-9,09 volumenprocent literimut: 43 kr. 00 øre
- 6) 9,10-11,09 volumenprocent literimut: 56 kr. 00 øre
- 7) 11,10-13,09 volumenprocent literimut: 66 kr. 00 øre
- 8) 13,10-15,09 volumenprocent literimut: 92 kr. 00 øre
- 9) 15,10-18,09 volumenprocent literimut: 114 kr. 00 øre
- 10) 18,10-22,09 volumenprocent literimut: 147 kr. 00 øre
- 11) 22,10-26,09 volumenprocent literimut: 187 kr. 00 øre
- 12) 26,10-30,09 volumenprocent literimut: 230 kr. 00 øre
- 13) 30,10-35,09 volumenprocent literimut: 280 kr. 00 øre
- 14) 35,10-45,09 volumenprocent literimut: 361 kr. 00 øre
- 15) 45,10-60,09 volumenprocent literimut: 495 kr. 00 øre
- 16) 60,10-100 volumenprocent literimut: 591 kr. 00 øre.

§ 1 a. Mineralvandinik, sodavandinik, limonadenik allanillu kulsyremik akoqartunik, ethanolimik akoqanngitsunik imeruersaatini aningaasarsutugalugu nunami maani sananermi akitsuummik akiliisoqartassaaq literimut: 3 kr. 50 øre.

§ 2. Akitsuut akilernerqassaaq atuineq ilutigalugu, tassa imaappoq nioqqutissat akitsuutip atuutsinneqannginnissaanik akuersissuteqarluni aaqqissuussinermut ilaajunnaarpata. Nioqqutissat suliffeqarfimmi nioqqutissanik sanaffiusumi tuniniarneqarpata atorineqarpataluunniit, nioqqutissat naammassillugit tunisassiarineqarnerminni atorineqartutut isigineqassapput.

§ 3. Suliffeqarfiit nioqqutissanik akitsuusigassanik sanasut piginnittuusutut akileraaruseriffimmi nalunaarsorneqassapput.

Imm. 2. Suliffeqarfiit nalunaarsorneqarsimasut akitsuummik atuutsitsinertaqanngitsumik nioqqutissanik akitsuusigassanik sanasinnaatitaallutillu uninngasuuteqarsinnaatitaapput.

§ 4. Init piginnittuusut nalunaarsorneqarsimasut nioqqutissanik akitsuusertinneqarsimanngitsunik sananerminnut, suliaqarnerminnut, maqitsinerminnut uninngasuuteqarnerminnullu atugaat akileraaruseriffimmit akuerineqarsimassapput.

Imm. 2. Init akileraaruseriffiup akileraaruserinermik ingerlatsineq pillugu inatsimmi § 58, imm. 4 naapertorlugu nakkutilliinissaanut naleqqutinnngitsumik atorineqarpata aaqqissugaappataluunniit, akuersissuteqarfigineqarneq nalunaarsortinnerlu atorunnaarsinneqarsinnaapput.

§ 5. Piffissaq akitsuuteqarfiusoq tassaavoq qaammat.

§ 6. Piginnittuusut nalunaarsorneqarsimasut piffissami akitsuuteqarfiusumi annertussuseq akitsuusigassaq naatsorsugassaat tassaavoq nioqqutissat akitsuusigassat suliffeqarfiup iniutaanit akuerisaasunit anninneqarsimasut annertussusiat, millissutaasimasut assigisaallu ilanngullugit.

Imm. 2. Naatsorsuineq maleruagassat Naalakkersuisunit aalajangersarneqarsimasut naapertorlugit sukumiisumik suliarineqassaaq.

Imm. 3. Nioqqutissat akitsuusigassat annertussusiata qanoq angissusilerneqarnissaanut maleruagassat Naalakkersuisunit aalajangersarneqarsinnaapput.

§ 7. Annertussuseq akitsuusigassamit § 6, imm. 1 naapertorlugu naatsorsorneqartumit ilanngaatineqassapput:

- 1) nioqqutissat ikualattoqarneratigut, erngartoqarneratigut assigisaatigulluunniit suliffeqarfimmi imaluunniit suliffeqarfimmut suliffeqarfimmiilluunniit assartorneqarnerminni annaaneqartut,
- 2) nioqqutissat utertinneqartut, aki akitsuummik ilaqartoq pisisumut utertinneqarpata,
- 3) imigassat Kalaallit Nunaata avataanut nioqqutigineqartut, aamma
- 4) imigassat ethanolimik akullit Kalaallit Nunaanni immiorneqartut, qaangiunnerata kingorna, imaluunniit assingusumik killiliunneqartup kingorna akuiakkat atuisunut tuniniarneqarsinnaajunnaartut.

Imm. 2. Imm. 1 naapertorlugu ilanngaatineqarsinnaasut nakkutigineqarnissaannut malittarisassat Naalakkersuisunit aalajangersarneqarsinnaapput.

§ 8. Piginnittuusut nalunaarsorsimasut nioqqutissanik akitsuusigassanik sananermut tunniussinermullu naatsorsuusiortassapput.

Imm. 2. Tamanna pillugu aalajangersakkat sukumiinerusut Naalakkersuisunit aalajangersarneqassapput.

§ 9. Piginnittuusut nalunaarsorsimasut qaammatit naaneri tamaasa, kingusinnerpaamillu piffissap akitsuuteqarfiusup tulliaata qaammatip 15-iani akileraaruseriffimmut nalunaarutigisassavaat, nioqqutissat akitsuusigassat qanoq annertutiginerat, tak. §§ -it 6 aamma 7. Nalunaarut suliffeqarfiup akisussaalluni aqutsisuanit atsiorneqarsimassaaq.

Imm. 2. Nalunaarut piffissaliussap taaneqartup qaangiutinnginnerani tunniunneqanngippat akileraaruseriffiup nalunaarsugaaneq, nalunaarutip tunniunneqanngitsup akileraaruseriffimmit tiguneqarnissaata tungaanut atorunnaarsissinnaavaa.

Imm. 3. Naalakkersuisut nalunaarut pillugu aalajangersagaliorsinnaapput.

§ 10. Akitsuut akilernerqartussanngussaaq, piffissap akitsuusiiffiusup malitsigisaatut qaammatip tulluuttup aallaqqaataani, nalunaarsugaasumillu uninngasuuteqartuusoq akitsuummik akileraaruseriffimmut akiliissaaq kingusinnerpaamik qaammammi akiliiffissanngorfiusup ulluisa 15-ianni.

Imm. 2. Naalakkersuisut akitsuutip akilernerqarnissaa pillugu aalajangersagaliorsinnaapput.

§ 11. Akileraaruseriffiup piginnittuusoq nalunaarsorsimasooq akitsuummik piffissaagallartillugu akiliinngitsooq, piffissamik qaammammit ataatsimit sivikinnerusumik piffissalerlugu nalunaaruteqaqqusinnaavaa.

Imm. 2. Aammattaaq akileraaruseriffiup piginnittuusoq nalunaarsorsimasooq akitsuummik piffissaagallartillugu akiliinngitsooq, piffissamik § 10-mi taaneqartumit sivikinnerusumik piffissalerlugu akiliinissamut piffissalersinnaavaa.

§ 12. Akitsuut akiligassanngorsimasooq akilernerqarfissami kingorna kingusinnerpaamik ullut 14-it qaangiunneranni akilernerqanngippat akileraaruseriffiup nalunaarsugaaneq, akitsuutit akiligassanngorsimasut akilernerqarserlugit arsaarinnissutigisinnaavai.

Imm. 2. Piffissaq akitsuuteqarfiusooq imaluunniit piffissaq akiliiffissaq § 11 naapertorlugu sivikillineqarsimappat nalunaarsugaaneq, piffissap akiliiffissap qaangiunneratigut ingerlaannaq arsaarinnissutigineqarsinnaavoq.

§ 13. Piginnittuusup nalunaarsorsimasup paasissutissanik eqqunngitsunik akileraaruseriffimmut nalunaaruteqarsimanera, taamaallunilu akitsuutitut akiliinikipallaarsimanera paasineqarpat aningaasat akiligassanngortut akileqquneqarneranniit kingusinnerpaamik ullut 14-it qaangiunneranni akilersinneqassapput.

§ 14. (atorunnaarpoq).

§ 15. (atorunnaarpoq).

§ 16. Nakkutilliinermi iliuusissat pillugit malittarisassanik Naalakkersuisut aalajangersaasinnaapput, tamatumani init atorneqartut qanoq aaqqissugaanissaannut tunngasunik, uuttuutit ivertinneqarnissaat pillugit aammalu assingusunik nakkutilliinermi iliuusissat pillugit, taakku akitsuutitik eqqortumik naatsorsuinerup qulakkeerneqarnissaaq siunertaqassallutik.

§ 17. (atorunnaarpoq).

§ 18. (atorunnaarpoq).

§ 19. Kinaluunniit piaaraluni imaluunniit mianersuaalliorujussuarluni iliuuseqartoq akiliinissamik pineqaatissinneqassaaq:

- 1) paasissutissanik akitsuutininik nakkutilliinermut atugassanik eqqunngitsunik paatsoorneqarsinnaasunilluunniit tunniussisoq imaluunniit paasissutissanik nipangiussisoq,
- 2) § 1, § 1 a, § 2, § 3, imm. 1, § 6, imm. 1, § 8, imm. 1, § 9, imm. 1 imaluunniit § 10, imm. 1 unioqqutippagu,
- 3) § 11, imm. 1 naapertorlugu peqquneqarnermik malinninngitsoq,
- 4) nalunaarsorneqarnerup Akileraartarnermik Aqutsisoqarfimmit § 9, imm. 2 imaluunniit § 12, imm. 1 aamma 2 naapertorlugit arsaarinnissutigineqareernerata kingorna ingerlatamik akitsuuteqarfusumik ingerlatsiinnartoq, imaluunniit
- 5) nioqqutissanik inatsit naapertorlugu akitsuutaannik akilerneqarsimasussaagaluani akitsuuserneqarsimanngitsunilli tunniussisoq, pissarsisoq, paarsisoq, atuisoq, assartuisoq imaluunniit pisoq.

Imm. 2. Inatsit manna naapertorlugu maleruagassiani aalajangersarneqarsinnaapput, maleruagassiani aalajangersakkanik piaaraluneerluni mianersuaalliorujussuarluniluunniit unioqqutitsisup akiliisinneqarnissaa pillugu aalajangersakkat.

Imm. 3. Unioqqutitsinerit imm. 1-mi imaluunniit imm. 2-mi taaneqartut arlaat aktieselskabimit, anpartsselskabimit, andelselskabimit, peqatigiiffimmit, ingerlatsivimmit imminut pigisumit, aningaasaateqarfimmit assigisaanilluunniit unioqqutitsineruppat, inatsitit malillugit inuttut isigineqarsinnaasoq taanna taamatut akiliisinneqarsinnaavoq.

Imm. 4. Akiliisitsissutit landskarsimut iluaqutissanngortinneqassapput.

§ 20. Naalakkersuisut, inatsimmi matumani aalajangersakkanik unioqqutitsisoq nalunaarfigisinnaavaat suliassaq eqqartuussinertaqanngitsumik naammassineqarsinnaasoq, unioqqutitsisup unioqqutitsisimanini nassuerutigippagu aammalu akiliisitsissut nalunaarummi allassimasoq piffissap aalajangersimasup, qinnuteqarnikkut sivitsorneqarsinnaasup iluani akilerumallugu piareersimappat.

Imm. 2. Nalunaarutiginninnermut, imm. 1-mi taaneqartumut atatillugu eqqartuussisarnermi inatsimmi aalajangersakkani unnerluutiginninnermut allassimasut atuutissapputtaa.

Imm. 3. Akiliisitsissut piffissaagallartillugu akilerneqarpat, aalajangiunneqareerner migulluunniit akilersinneqarpat suliaq malersooqqinneqassanngilaq.

§ 21. Inatsit ulloq 1. januar 2004-miit atortuulerpoq.

(Akileraaruserinerup qitiusumik ingerlanneqalernerata kingunerisaanik allannguutit)^[1] piffissaq atuutilerfissaq pillugu ima aalajangersagaqarpoq:

§ 2

Inatsisartut inatsisaat atuutilerpoq 1. juli 2007.

Imigassat ethanolimik akullit Kalaallit Nunaanni sananeqarsimasut akitsuutaat pillugit Inatsisartut inatsisaata allanngortinneqarneranik Inatsisartut inatsisaat nr. 9, 19. oktober 2007-imeersoq (Akitsuutinik qaffaaneq ammalu sodavandinut akitsuut)^[ii] piffissaq atuutilerfissaq pillugu ima aalajangersagaqarpoq:

§ 2

Inatsit 22. oktober 2007-imi atuutilerpoq.

Imigassat ilaannut Kalaallit Nunaanni sananeqarsimasunut akitsuutit pillugit Inatsisartut inatsisaata allanngortinneqarnissaa pillugu Inatsisartut inatsisaat nr. 2, 24. maj 2019-imeersoq (Pineqaatissiisarnermik aalajangersakkap erseqqissarneqarnera)^[iii] piffissaq atuutilerfissaq pillugu ima aalajangersagaqarpoq:

§ 2

Inatsisartut inatsisaat 1. juni 2019-imi atuutilerpoq.

Imigassat ilaannut Kalaallit Nunaanni immiorneqartunut akitsuutit pillugit Inatsisartut inatsisaata allanngortinneqarnissaa pillugu Inatsisartut inatsisaat nr. 69, 20. novembari 2023-meersoq (Imigassat ethanolimik akullit Kalaallit Nunaanni immiorneqartut ullussaminnik qaangiisimasut akuiarneqarneranut akitsuummik utertitsineq)^[iv] piffissaq atuutilerfissaq pillugu ima aalajangersagaqarpoq:

§ 2

Inatsisartut inatsisaat 1. januari 2024-mi atuutilissaaq.

Nikolai Sten Christensen (atsior.)
Naalakkersuisoqarfimmi pisortaq

/ Morten Wenzel Selvejer (atsior.)

[i] Inatsimmik allannguinerup § 8, imm. 3, § 9, imm. 3, § 10, imm. 2, § 13, imm. 2-3, § 14, § 15, § 17 aamma § 18-imi inatsit ima allanngortinneqassapput “Akileraartarnermut Pisortaqarfik”-mit “akileraaruseriffik”-mut kiisalu § 4, imm. 2, § 10, imm. 1, § 16 aamma § 19, imm. 1, nr. 2 allanngortinneqarlutik.

[ii] Inatsimmik allannguinerup inatsit nutaamik qulequtalissavai aamma § 1-imi annertussusiliinerit allanngortillugillu § 1 a nutaaq ilanngullugu.

[iii] Inatsimmut allannguut § 19, imm. 1-imut tunngavoq.

[iv] Inatsimmut allannguummi § 7, imm. 1, nr. 4 ilanngunneqarpoq, kalaallisuanilu § 19, imm. 1, nr. 2-mi oqaasertai allanngortinneqarlutik.

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut